

Nalinginnaasumik nassuaatit

1. Inatsisissatut siunnersuutip tunuliaqutai siunertaalu

Inatsisartut inatsisaata allanngortinneqarnissaanut siunnersuutip siunertaraa
Inatsisartut Nunanut Allanut Sillimaniarnermullu Ataatsimiititaliaata allaffikkut
suliassaataasa Naalakkersuisut Allattoqarfianit (Nunanut Allanut Allaffik)
Inatsisartut Allattoqarfiannut nuunneqarnissaat. Peqatigisaanik erseqqissarneqarpoq,
maannamut periusiulersoq naapertorlugu, naalakkersuisut siulittaasuata
ataatsimiititaliamut ilisimatitsissuteqartarnera inatsisartut ataatsimiinnerini
ataasiakkaani pisarunnaartoq.

Inatsisartut Naalakkersuisullu pillugit Inatsisartut inatsisaanni § 18, imm. 3-mi
aalajangersagaavoq ataatsimiititaliap allaffikkut suliassaatai Naalakkersuisut
siulittaasuata allattoqarfianit isumagineqassasut. Nunanut Allanut
Sillimaniarnermullu Ataatsimiititaliaq pillugu inatsisartut inatsisaanni nr. 11, 20.
oktober 1988-imeersumi aalajangersakkat suliarineqarmata Folketingets
Udenrigspolitiske Nəvn pillugu maleruagassat aallaavigineqarput. Taamanikkut
Nunanut allanut ministeriaqarfik ataatsimiititap allaffikkut suliassaataanik
isumaginnittuuvoq. Aamma taamanikkut Inatsisartut ataatsimiititaliaasa allat
allaffikkut suliassaataat Naalakkersuisut allattoqarfianit isumagineqarput.
Taamaattumik allaffikkut suliassat Naalakkersuisut Siulittaasuata Allattoqarfianit
isumagineqarnissaat aalajangiutissallugu taamanikkut pissusissamisoorsimavoq.

Ataatsimiititaliap susassaqarfiata iluani ingerlatat ukiut ingerlanerini
amerliartungaatsiarsimaput aammalu Inatsisartut Allattoqarfianni
pilersinneqarsimavoq ataatsimiititalianut sullissivik immikkoortoq, tak. Inatsisartut
Suleriaasaanni § 22, imm. 1. Aamma Folketingip nunanut allanut tunngasunut
ataatsimiititaliaa Folketingets Udenrigspolitiske Nəvn eqqarsaatigalugu
ingerlaqqittoqarsimavoq, tassa taanna Folketingip allattoqarfiani immikkut
allattoqarfeqalersimagami, taamaalluni taassuma ataatsimiititap ilaasortaasalu
ulluinnarni ikorfartorneqarnerisa annersaa tigusimallugu. Ataatsimiititap
sullinneqarnera massakkut allattoqarfii Folketingimiittup aamma Nunanut Allanut
Ministeriaqarfimmiittup akornanni qanumut suleqatigiinnikkut ingerlanneqarpoq.

Tamanna tunuliaqutaralugu pissusissamisoorsorineqarpoq allaffikkut suliassaatit
Naalakkersuisut siulittaasuata Allattoqarfianit Inatsisartut Allattoqarfianut
nuunnissaat.

1988 kingornatigut namminersorneruneq pillugu inatsisip §§ 11-mi aamma 13-imi
killiliussat iluini nunanut allanut sillimaniarnermullu naalakkersuinikkut
namminersornerullutik oqartussat ingerlataat amerleriangaatsiarsimapput,
taamaattumik apeqqutit naalagaaffiup nunanut allanut pissusiinut tunngasut
naalagaaffimmi pisortaatitat aalajangiiffisarpaat (§ 11). Naalagaaffiit akunnerminni
isumaqatigiissutaat Folketingip akuersinissaanik piumasaqarfiusut kalaallillu
soqutigisaannut attuumalluinnartut isumaqataaffigineqannginnerini

Namminersornerullutik Oqartussanit oqaaseqarfifeqqullugit saqqummiunneqartassapput (§ 13), kiisalu Namminersornerullutik Oqartussat periarfissinnejarsinnaapput kalaallit inuussutissarsiornermut immikkut soqutigisaannik munarsuarmiut oqaloqatigiinnerini peqataanermikkut tamaviaarutiginninnissamut (§ 16).

Nunanut allanut sillimaniarnermullu naalakkersuinikkut ingerlatsinermut tunngasuni Namminersornerullutik Oqartussat peqataaneranni periusiulersimasoq nalunaarusiami "Anorakrapporten" juli 1999-imeesumi allaaserineqarpoq. Nalunaarusiaq taanna nunanut allanut sillimaniarnermullu tunngasuni Namminersorneq pillugu Isumalioqatigiissitat isumaliutersuutanut siunnersuutanullu ilaatigut aallaaviuvoq. Kiisalu periuseq paasineqarsinnaavoq nunanut allanut naalakkersuinikkut ingerlatsineq pillugu naalakkersuisut ukiumoortumik inatsisartunut nassuaateqartarneranni.

Tunngavissatut Itillimi nalunaarutikkut 14. maj 2003-meersukkut nunanut allanut sillimaniarnermullu tunngasutigut naalakkersuinikkut ingerlatsinermi immikkut Kalaallit Nunaannut tunngasuni ilaatinneqarneq danskit kalaallillu naalakkersuisuisa imminnut upternarsarpaat.

Killiliussat taakku iluini, t.i. namminersorneruneq pillugu inatsisip periusiulersimasullu annertusisap, nunanut allanut sillimaniarnermullu naalakkersuinikkut ingerlatsinermi suliassat Naalakkersuisut isumagisaraat. Nunanut allanut sillimaniarnermullu naalakkersuinikkut ingerlatsinermi paassisutissat pingaaruteqartut tiguneqartut Naalakkersuisut siulittaasuata ataatsimiititaliamut ilisimatitsissutigisarpai ataatsimiititaliamillu isumasioqatigiissutgisarlugit. Taamaattumik inatsisartut ataatsimiinnerisa ataasiakkaat nalaaniinnaq paassisutissisoqartangilaq, soorlu § 18, imm. 1-ip maannakkut oqaasertai malillugit taamaattussaagaluartoq. Taamaattumik aalajangersakkap taassuma iluarsineqarnissaa pissusissamisoorsorineqarpoq.

Ataatsimiititaliap ingerlatsinerata qanoq ittuussusiata allangortinneqarnissaa siunnersuutikkut siunertarineqanngilaq.

Taamaattumik danskit naalakkersuisuisa aamma Folketingip nunanut allanut tunngasunut ataatsimiititaliaata akornanni pissusiusut assigalugit ataatsimiititaliaq Naalakkersuisunut piginnaatitsisussaanngilaq, kisianni paassisutissat Naalakkersuisut siulittaasuata ataatsimiititaliamut saqqummiussai tunngavigalugit Naalakkersuisut ataatsimiititaliallu akornanni oqaloqatigiittarnerit ingerlaannarnissaat siunertarineqarpoq, matumani pineqarput paassisutissat Naalakkersuisut siulittaasuata Allattoqarfiata (Nunanut allanut allaffik) pissarsiarisimasinnaasai imaluunniit danskit naalakkersuisuinit pissarsiarisimasai. Pituffimmi radarip nutarterneqarnissaa pillugu suliap pilerneranit danskit naalakkersuisuiniit paassisutissat (oqalugiatissatut taamaaqataatulluunniit) nunanut allanut ministerip Folketingip nunanut allanut tunngasunut ataatsimiititaliaanut saqqummiussaanik ataatsimiititaliap pissarsisarnera periusiulerpoq.

2. Tusarniaaneq

Inatsisissatut siunnersuut Inatsisartut Allattoqarfianut Inatsisileriffimmullu tusarniaatiginqarsimavoq, taakkulu oqaaseqaataat ilanngunneqarlutik.

Kiisalu siunnersuut Nunanut allanut ministeriaqarfimmut tusarniaatigineqarsimavoq, tassa namminersorneruneq pillugu inatsimmi § 11 naapertorlugu apeqqutini naalagaaffiup nunanut pissusiinut tunngasuni naalagaaffimmi pisortaatitat aalajangiisussaammata. Inatsisartut Nunanut Allanut Sillimaniarnermullu Ataatsimiititaliaat pillugu aalajangersagassatut siunnersuutit inatsisip 1988-imi allanngortinnejnarneranut atatillugu Nunanut allanut ministeriaqarfimmut taamaaqataanik tusarniaatigineqarsimapput. Nunanut allanut ministeriaqarfíup oqaaseqaatai ilanngussuunneqarpuit.

3. Aningaasatigut, allaffissornikkut inatsisiliornikkullu kingunerisassai

Ataatsimiititaliap allaffikkut suliassaatai maannamut Naalakkersuisut siulittaasuata Allattoqarfianit (Nunanut Allanut Allaffik) suliassat ataatsimiititaliamut ilisimatitsissutigineqartussat suliarineqartarnerannut ilaatillugit suliarineqartarput. Sulias sat tamakku annertussusiat allannguuteqassanngilaq. Taamaattumik allaffikkut sulias sat nuunneqarnerat aningaasatigut imaluunniit sulisutigut Nunanut Allanut Allaffimmut kinguneqassanngillat.

Ataatsimiititaliap allaffikkut suliassaataanik isumaginninneq Nunanut Allanut Allaffiup ilisimasai malillugit sulisup AC ukiup ataatsip sisamararterutaani sulineranut naapertuuppoq.

Inatsisissatut siunnersuutip nassatarissavaa Inatsisartut suleriaasissaani § 22, imm. 1-imi allannguisariaqarneq. Allanngortitsinerup inatsisini allatigut allanngortitsinissaq pisariaqalersissanngilaa.

Siunnersummi aalajangersakkanut ataasiakkaanut nassuaatit

§ 1-imut

Nr. 1-imut.

Oqaatsit "Inatsisartuni ataatsimiinnissaq sioqqullugu" peerneqarnerisa ersersippaat naalakkersuisunut siulittaasoq nunanut illersornissamullu naalakkersuinikkut ingerlatsinermi Kalaallit Nunaannut soqtiginaateqartunik paasissutissanik, t.i.

paasissutissanik Kalaallit Nunaannut annertuumik sunniuteqartussanik, pisariaqartitsineq malillugu saqqummiussisinnaasoq. Taamaattumik paasissutissat taamaallaat inatsisartut ataatsimiinnerannut atatillugu nalunaarutigineqartarunnaassapput.

Nr. 2-mut.

Inatsisartut Naalakkersuisullu pillugit inatsisartut inatsisaat Inatsisartut ataatsimiitaliaasa allat allaffikkut suliassaataat pillugit aalajangersakkanik imaqanngilaq. Imm. 3-p, taanna malillugu ataatsimiitaliap allaffikkut suliassaatai naalakkersuisut siulittaasuata allattoqarfianit isumagineqassallutik, maannakkut atuuttup peerneqarnerata nassatarissavaa ataatsimiitaliaq Inatsisartut ataatsimiitaliaat allat assigalugit allaffikkut sullinneqalissammat, t.i. Inatsisartut Allattoqarfianit. Paasissutissat atortussallu maannamutut Naalakkersuisut Allattoqarfianit (Nunanut allanut allaffik) pissarsiarineqartassasut naatsorsuutigineqarpoq, taamaattumik ataatsimiitaliap sullinneqarneranut atatillugu Inatsisartut Allattoqarfiaita aamma Nunanut allanut allaffiup akornanni qanumut suleqatigiinnissaq pisariaqassaaq.

§ 2-mut.

Siunnersuutigineqarpoq inatsisartut inatsisaat 1. december 2003-mi atuutilissasoq.